



KEMENTERIAN TENAGA DAN SUMBER ASLI

# SIARAN MEDIA

---

## PERUTUSAN MENTERI SEMPENA HARI TANAH LEMBAP SEDUNIA 2022

---

Hari Tanah Lembap Sedunia (*World Wetlands Day*) disambut pada 2 Februari setiap tahun untuk meningkatkan kesedaran tentang kepentingan memelihara dan memulihara kawasan tanah lembap di samping memperingati tarikh penubuhan Konvensyen Ramsar.

Tanah lembap meliputi kawasan-kawasan tanah gambut, paya bakau, sungai, tasik dan pesisiran pantai yang menjadi habitat kepada kepelbagaian spesis flora dan fauna terutamanya burung yang bermigrasi. Malaysia telah menyertai Konvensyen Ramsar pada 10 Mac 1995.

Sehingga kini, terdapat 7 kawasan yang diiktiraf sebagai Tapak Ramsar di Malaysia iaitu Tasek Bera, Pahang; Tanjung Piai, Pulau Kukup dan Sungai Pulai, Johor; Kuching Wetlands National Park, Sarawak; dan Lower Kinabatangan-Segama Wetlands dan Kota Kinabalu Wetlands, Sabah. Tapak-tapak ini dilindungi melalui pewartaan oleh Kerajaan Negeri sama ada di bawah undang-undang perhutanan, taman negeri, Hutan Simpanan Kekal atau kawasan perlindungan tanah lembap.

Tema sambutan Hari Tanah Lembap Sedunia pada tahun 2022 adalah ***Wetlands Action for People and Nature***. Tema ini mengetengahkan kepentingan pelaksanaan tindakan-tindakan bagi meningkatkan usaha pemuliharaan dan penggunaan tanah lembap secara mampan agar kemandirian ekosistem tanah lembap dapat dikekalkan untuk generasi akan datang.

Kementerian Tenaga dan Sumber Asli (KeTSA) akan meneruskan pelaksanaan Program Penanaman Pokok Bakau dan Spesies-spesies yang Sesuai di Pesisiran Pantai Negara yang meliputi aktiviti pemeliharaan dan pemuliharaan hutan paya bakau serta peningkatan kesedaran masyarakat. Di samping itu, pada tahun ini KeTSA juga akan melaksanakan pemasangan *coastal block and eco-friendly raft pile* bagi mengurangkan hakisan pantai di Tapak Ramsar Tanjung Piai, Johor.

Bersempena dengan tema *Wetlands Action for People and Nature*, saya menyeru sokongan dan kerjasama Kerajaan-Kerajaan Negeri, Pihak Berkuasa Tempatan, pihak swasta, Pertubuhan Bukan Kerajaan (NGO) dan masyarakat awam untuk bersama-sama memainkan peranan dalam melindungi ekosistem tanah lembap di negara kita. KeTSA turut menyokong usaha penyelidikan dan pembangunan (R&D) tanah lembap melalui penyediaan dana di bawah Tabung Amanah Konservasi Sumber Asli Nasional (NCTF). Antara fokus pembiayaan dana tersebut adalah untuk mengurus, memantau dan melindungi kawasan-kawasan berkepentingan biodiversiti dan Kawasan Sensitif Alam Sekitar (KSAS).

KeTSA menyambut baik sebarang pencalonan kawasan yang berpotensi untuk dicalonkan sebagai tapak-tapak berkepentingan biodiversiti antarabangsa oleh Kerajaan Negeri. Antara kawasan yang berpotensi adalah seperti Kuala Gula-Matang di Perak dan Teluk Air Tawar-Kuala Muda di Pulau Pinang. KeTSA juga akan terus memberi sokongan kepada semua usaha ke arah mengekal, memelihara dan memulihara tanah lembap demi memastikan kelestarian dan kelangsungan khazanah biodiversiti negara.

Selamat Menyambut Hari Tanah Lembap Sedunia 2022.

**DATUK SERI TAKIYUDDIN BIN HASSAN**  
**MENTERI TENAGA DAN SUMBER ASLI**

**2 FEBRUARI 2022**

